

重刊道藏輯要

太上混元聖紀卷之一

宋觀復大師高士謝守灝編

太上老君者大道之主宰萬教之宗元出乎太无之先起乎无極之源經歷天地不可稱載終乎无終窮乎无窮者也其隨方設教歷劫爲師隱顯有无罔得而測然垂世立教應現之迹昭昭然若日月其可无記述乎夫何紀傳率多疏略如司馬遷史記班固古今人表劉向之載列仙嵇康皇甫謐之敘高士與夫葛稚川之神仙傳暨集仙總仙等傳例皆蔑裂百不具一尹文操編聖紀八百二十章賈善翔傳猶龍析爲百篇雖記述頗詳

道藏輯要

混元聖紀

尾集六

而枝蔓旁引首尾失次其間取舍未免乖違二三其說覽者滋惑每一披卷爲之感慨誠教門之闕典也今不揆愚陋徧考三教經典傳記究其源流仍序歷代崇奉之事編爲聖記冠以年譜若夫五太之初九皇之始真文未兆載籍叵詳今始纂書史所載老君應世之歲月述其年譜於左

天皇

皇甫謐三五歷云天地初立有天皇氏十二頭木德王歲起攝提兄弟十二人立各一萬八千歲徐整三五歷紀云元炁肇始有神人號天皇時老君降世號通玄天師一號玄中大法師唐翰林學士承旨樂明龜撰青羊宮記云太上立元老

君應運降跡與天皇爲師上清下濁之初開相離未遠六合
八紘之乍圻相去未遙正方圓上下之形定洪荒朴略之狀
川新融而水仍晦土始結而石未堅配四海於四神付五行
於五帝

地皇

老君下降爲師號有古大先生唐紀云是時乾象猶低坤形
仍薄立極定位敷化建功我太上老君屑跡下降與地皇爲
師分配剛柔制定寒暑地增博厚天益高明聖力无窮神功
靡測萬木甲圻萬草勾萌羽族毛羣區分於兌離之位介蟲
鱗類支分於坎震之宮

道藏輯要

混元聖紀

二

尾集六

人皇

春秋緯作
九頭記

老君下降爲師號盤古先生三五歷紀云天地混沌如鷄子
盤古生其中天地開闢盤古在其中後乃有三皇此三才之
始也唐紀云已踰青海之年又離青海之歲二聖旣理四表
生光我太上老君博施濟眾與人皇爲師三百六十之川初
分血脈一萬五千之策乍配偶奇三壬三乙之神離胎於水
木六丙六辛之將出孕於火風一百五十六代四萬五千餘
年始稱通玄天師再號金闕帝君三名盤古先生

五龍紀

五姓玉皇通
一歷勾龍紀

連通紀

六姓或作連遙紀春秋緯及
河圖五皇歷皆作連通紀

合雄紀

三姓春秋緯作合雄紀初置天地經作合雄紀

五姓紀

河圖云通紀五姓是謂五姓紀春秋緯有攝提紀而五姓紀又序次羌一紀

敘命紀

四姓置天地經作厚紀玉皇歷作立命紀

修飛紀

九姓河圖作居方氏

因提紀

河圖作提挺紀

禪通紀

七十二姓河圖作通姓紀

流訖紀

史記索隱三皇紀云流訖紀當黃帝時制九紀之間

按河圖代姓記太古者生民之始也男女姁精以女生爲姓始

三頭謂之合雄紀生號三世合雄氏沒子孫相傳記其壽命是

謂敘命紀通紀四姓生子二世男女眾多羣居連通是謂連通

道藏輯要

混元聖紀

三

尾集六

紀生子一世通紀五姓是謂五姓紀天下羣居以類相親男女

眾多分爲九頭各有居方故稱居方氏生子三十二世強弱相

凌欲生吞害中有神人提挺而治故號提挺氏生子三十五世

通紀七十二姓故號通姓氏通姓氏之後有有巢氏天下九頭

咸歸而尊事之有巢氏生燧人氏燧人氏生伏犧河圖及三五

歷云白人皇已後有五龍氏燧人氏大庭氏柏黃氏中央氏卷

須氏栗陸氏驪連氏赫胥氏尊盧氏混沌氏昊英氏有巢氏朱

襄氏葛天氏陰康氏无懷氏而不知其姓氏世次三墳載天皇

伏犧氏策辭云皇曰命子襄居我飛龍之位主我圖文代我咨

告於四方上下无或差忒後昊英氏進歷於君曰歷起甲寅皇

日甲日寅辰木王於卯二月乃集眾於傳教臺告民示始甲寅
后女媧氏无懷氏輔君之右上相共工下相皇亘飛龍朱襄氏
潛龍昊英氏居君左右栗陸氏居北赫胥氏居南昆連氏居西
葛天氏居東陰康氏居下九州之牧各統其人羣居於外皇曰
栗陸子居我飛龍之位主養草木開導泉源毋或失時曰大庭
子主我屋室視民之未居者喻之借力同創其居无或寒冷曰
陰康子主我水土俾民居處无或漂流勤於道陸曰混沌子居
我降龍之位惟主於民曰昆連子主我刀斧无俾野獸犧虎之
類傷殘生民皇曰四方之君咸順我辭則世无憂惟愛於民則
位不危又日子无懷安惟安於民民安子安民危子危其子念
哉以三墳之書考之則伏犧氏爲後天皇氏女媧无懷其后也
朱襄昊英其子也共工皇亘其相也栗陸赫胥昆連葛天大庭
陰康混沌皆其神也居內則其六卿分職以治其國在外則爲
四方君長以牧其民所謂九頭者是也然皆一時人初无世代
之異而歷代典籍所載多列爲先後何也意者伏犧氏没其后
嗣及其九頭之臣皆享遐齡且迭爲君主耶不然則其臣之子
孫咸祚有國因祖命氏耳韓詩外傳以爲自古封泰山禪梁甫
者萬有餘家仲尼觀之不能盡識管子亦曰古封泰山七十二
家夷吾所識十有二焉其首有无懷氏則知其伏犧之前帝王
世代先後不可得而識者蓋亦多矣春秋緯稱自開闢至於獲

道藏輯要

混元聖紀

四

尾集六

メ文リ

麟凡三百二十七萬六千歲分爲十紀一曰九頭紀二曰五龍紀三曰攝提紀四曰合雄紀五曰連通紀六曰敘命紀七曰修飛紀八曰因提紀九曰禪通紀十曰流訖紀蓋流訖紀當皇帝時制九紀之間今有周敬王之三十九年春秋魯哀公之十二年庚申西狩獲麟逆數至黃帝元年丁亥纔三千九百三十歲自黃帝推而上之至於開闢當有三百二十七萬二千餘歲其間帝王年代莫得而考雖間見於諸子圖緯之書然疑相傳无所折衷今姑存而不論

伏犧

太昊姓風木德初造歷元年起甲寅女媧繼之子孫相承四萬五千六百年

河圖代姓紀云伏犧氏燧人子也因風而生故風姓龍馬負

道藏輯要

混元聖紀

五

尾集六

圖始畫八卦命飛龍氏造六書命潛龍氏作甲歷伏犧制牛冶金成器教民炮食易九頭爲九牧因龍出而紀官因鳳來而作樂天下之民號曰天皇太昊伏犧時老君降世居荒野號鬱華子唐紀云庖犧氏之王天下也我太上以道弘濟降跡爲師教之以畫八卦指之以分三才助之以造書契之文製之以代結繩之政

祝融

炎帝姓姜火德起丙辰始教民陶冶故號炎帝

按禮記謚號記先祝融後神農餘注則先神農後祝融竊謂祝融爲炎帝之祖以火德王必不後於神農今當以禮記爲正其高陽氏之子黎爲火正故亦號祝融至今爲南方司火

之神月令曰其帝炎帝其神祝融則祝融爲火德之祖明矣
時老君降濟陰號廣壽子

神農

連山氏祝融之後始教民耕種百谷故號神農子孫相承五百三十年

河圖代姓紀號爲人皇時老君降于濟陰號大成子唐紀云
連山氏之王天下也我太上救時屈已下爲帝師付之於五
運分之於四時助之以正萬機明之以辨百谷變飲血茹毛
之化移糞桴土鼓之音毀穴焚巢上棟下宇範金合土燔黍
擘豚製耒耜以濟兆民作陶冶以利萬物天雨粟以呈瑞地
芒稼而彰稔

黃帝

有熊氏姓公孫土德起丁亥子孫相承共一千五百二十年

道藏輯要

混元聖紀

六

尾集六

河圖代姓紀號爲地皇時老君降世居于崆峒山號廣成子
唐紀云有熊氏之王天下也我太上隱身於崆峒之申放心
於杳冥之外帝乃親降輦輅禮展師資旣摳衣以趨隅遂屈
膝而問道當是時也榆岡凌虐蚩尤作亂化魚鱉爲兵士以
助王師變雲霞爲神祇潛扶軍陣能弭兵於涿鹿偃戈於阪
泉東遊青邱之鄉北到洪隄之境受丹經於玉室登蒼冥於
鼎湖屈軼旣生糞莢復出莫非大道孰可致斯按玉緯經有
三種三皇有前中後之異故稱九皇洞神大有經云三皇治
各三千六百年又小有經云三皇治各萬八百歲詳此二說
大有經止論一代三皇每一皇治三千六百年小有經乃統

論三代三皇每一皇治萬八百歲也若通論三代九皇則共經三萬二千四百年矣或言萬八千者蓋百字誤爲千耳今據老子內傳所明正與大有小有相符又前三皇中三皇各經九千九百億萬歲者乃計一劫之大數非止言三皇之身也所言後三皇者傳記所載亦多不同如洞神經與項峻止以天皇地皇人皇爲三皇而三墳書以伏犧爲天皇神農爲人皇黃帝爲地皇而皇甫謐注春秋運斗樞鄭玄高誘注呂覽以庖犧女媧神農爲三皇禮記諡號記以伏犧祝融神農爲三皇孔安國韋昭陶隱居以伏犧神農黃帝爲三皇尙書大傳應邵譙周以燧人庖犧神農爲三皇聊氏以有巢燧人

道藏輯要

混元聖紀

七

尾集六

伊祈爲三皇帝系譜中經出塞記瀨鄉記以伏犧神農祝融爲三皇所見不同難遽加雌黃也而梁武帝以伏犧神農燧人爲三皇以黃帝少昊帝嚳帝堯爲五帝謂舜非三王亦非五帝與三王爲四代其說猶所不通歷世紛紛莫有定論也

少昊

金天氏黃帝之後金德起
辛未子孫相承共四百年

老君復降于崆峒號隨應子一號太極先生唐紀云金天氏之王天下也我太上乘九龍之輦降以爲師號太極先生說莊敬之典教之順時迎氣昭配神明羽族呈休命之鳥官理分九鳳以統百師景合璧以表靈鳳銜圖而示貺悉由至道

彰此帝謨

顓帝

高陽氏姓姬水德在位七十八年元年辛卯

老君降于衡山號赤精子唐紀云高陽氏之王天下也我太上教之解紛塞兌治國安民滌蕩九黎陟明八凱有龍野紫髯之兇醜有蛇身赤髮之渠魁力拔不周首觸山碎天低西北致日月之西行地亞東南使江海而東注追呼六甲役御百靈訓之以微言之經教之以大順之道乘蒼虬之迅駕或適幽陵御素螭以遐遊或臻蟠木

帝嚳

高辛氏黃帝之後木德在位七十年元年巳酉

老君降世居於江濱號錄圖子唐紀云高辛氏之王天下也

道藏輯要

混元聖紀

八

尾集六

我太上敷道佈化濟代爲師談黃庭之妙言隱日遁月稱錄圖之嘉號返邑移城制九州之命作六英之樂封勾芒以佐蒼帝敕蓐收以翼白方封岱嶽而印金泥照寰區而開玉鏡飲太活之井遊不夜之鄉

帝堯

陶唐氏姓伊耆火德在位七十年元年戊戌

老君降世居姑射山號務成子唐紀云陶唐氏之王天下也我太上暫垂至理下降爲師講立德之經道以匡於立化應丹陵之瑞名冀列於丹邱披鹿裘以食糲饌端拱于上階掛鶴氅而飲流霞凝思於瑤圃

帝舜

有虞氏姓姚土德攝位三十九年在位五十年元年戊申

老君降世居河陽號尹壽子唐紀云有虞氏之王天下也我
太上談无爲之理講離合之經三苗克俊四罪咸服百揆時
序五典謹徽懷明神之珠賜照華之玉按孔子家語季康子
問曰舊聞五帝之名而不知其實請問何謂五帝孔子曰昔
邱也聞諸老聃曰天有五行水火木金土分時化育以成萬
物其神謂之五帝古之王者易代而改號取法五行五行更
王終始相生亦象其義故其爲明王者死配五行是以太皞
配木炎帝配火黃帝配土少皞配金顓帝配水也康子曰太
皞之始以木如何孔子曰五行用事先起於木木東方也萬
物之初出焉是故王者則之而首以木德王天下其次則以

道藏輯要

混元聖紀

九

尾集六
ノ上リ

所生之行轉相承也康子曰吾聞勾芒爲木正祝融爲火正
蓐收爲金正玄冥爲水正后土爲土正此五行之主而不得
稱曰帝者何也孔子曰凡五正者五行之官名五行佐成上
帝而稱五帝太皞之屬配焉故亦云帝從其號也少皞氏之
子曰重爲勾芒曰該爲蓐收曰修及熙爲玄冥顓頊氏之子
曰黎爲祝融共工氏之子曰勾龍爲后土此五者各以其所
能業爲官職生爲上公死爲貴神則稱五祀不得同帝也康
子曰陶唐有虞夏后商周獨不得配五帝意者德不及上古
耶將有限乎孔子曰古之平治水土及播植百穀者眾矣惟
勾龍氏兼食於社而棄爲稷神歷代奉之無敢易者明不可

與等也故自太皞以降逮爲顓頊應五行而王數非從五而配五帝是其德不可以多也宋朝劉道源通鑑外紀於舜紀敘曰六經皆不稱三皇五帝三王易下繫辭曰庖犧氏沒神農氏作神農氏沒黃帝堯舜氏作繼世更王而無三五之數或以庖犧至舜爲五帝孔子未嘗道者不可附會臆說也管子稱明一者皇察道者帝通德者王謀得兵勝者霸孔穎達謂管子書或是後人所錄非本書也或謂莊子列子皆寓言誕妄秦漢學者宗其文辭論議故競稱三皇五帝而不知古無其人其論辯雖若可取然考之實故亦未爲通論又其所載帝王世數歲月考之歷代紀傳及長歷皆牴牾不合推之

道藏輯要

混元聖紀

十

尾集六

甲子又參差抑傳寫者之誤與其圖欲求異於人與抑第究其大體而不暇計其細與特未可知也且如宰我問孔子以上世之傳孔子猶曰略聞其說而已況去古逾遠而才不逮聖人者乎至於季康子五帝之問則對以昔聞之老聃云未嘗敢謂古無其人也此亦見聖人信而好古之意唯司馬遷帝紀表曰學者多稱五帝尙矣然尙書獨載堯以來而百家言黃帝其文不雅馴縉紳先生難言之孔子所傳宰予問五帝德及帝繫姓儒者或不傳余嘗西至崆峒北過涿鹿東漸于海南浮江淮矣至長老皆各往往稱黃帝堯舜之處風教固殊焉總之不離古文者近是予觀春秋國語其發明五帝

德帝繫姓彰矣顧第弗深考其所表見皆不虛書缺有間矣其軼乃時時見於他說非好學深思心知其意固難與淺見寡聞者道也夫太史公博極羣書厯訪古迹其爲良史宜矣

夏禹

姒姓金德元年戊戌建寅正月子孫相承共四百三十二年

老君降世居商山號真行子唐紀云夏后氏之王天下也我

太上克匡王道爰作帝師談德行之經行爲國之法

商湯

子姓水德元年庚戌建丑正月在位一十三年子孫相承共六百一十三年

老君降世居于潛山號錫則子唐紀云成湯之王天下也我

太上權離左極下爲王師說長生之經體自然之道

以上事迹互見於帝系譜帝王世紀洞神大有經玉厯經

道藏輯要

混元聖紀

十二

尾集六
川文久

出塞記地理志譙周古史考神仙傳郡國圖經云老君雖

分身下降隨世立教事竟則隱故在世未有誕生之迹

外丙

元年癸亥在位二年

仲任

元年乙丑在位四年

太甲

元年巳巳在位三十三年號太宗亦號祖甲

沃丁

元年壬寅在位二十九年

太庚

元年辛未在位三十五年

小甲

元年丙午在位一十七年

雍巳

元年癸亥在位一十二年

太戊

元年乙亥號中宗在位七十五年

仲丁 九年庚寅在位一十一年

外壬 元年辛丑在位五年

河亶甲 元年丙午在位九年

祖己 元年乙卯在位二十一年

祖辛 元年乙亥在位一十六年

沃甲 元年辛卯在位二十二年

祖丁 元年癸丑在位二十二年

南庚 元年乙亥在位二十九年

陽甲 元年甲辰在位一十八年

十七年庚申老君自太清境分神化炁託孕於玄妙玉女

道藏輯要

混元聖紀

十三

混元聖紀

盤庚 元年壬戌在位二十九年

小辛 元年辛卯在位二十一年

小乙 元年壬子在位二十年

武丁 元年壬申在位五十九年號高宗

九年庚辰二月建寅十五日

商之二月望今之上元節也通鑑外紀云自夏之前皆以建寅

之月爲正月湯革夏命乃以建丑爲正月也

老君降生自陽甲十七年託孕至此八十一年

劉向列仙傳云老子生於商時嵇康皇甫謐云生商末唐朝以生日爲真元節樂朋龜記云商高宗御極之世周文王演易之初神光流入於瓊胎瑞彩結成於金骨不折不副誕彌

於八十餘齡降世降生過期者三萬餘晝四十二年甲寅老
君降乘白鹿登庭檜之杪而飛昇今有昇天鹿跡在亳州太

清宮

祖庚

元年辛未在位一十七年

祖甲

元年戊子在位一十七年

廩辛

元年乙巳在位六年

庚丁

元年辛亥在位二十一年

武乙

元年壬申在位四年
侮慢上天暴雷擊死

太丁

元年丙子在位四年

帝乙

元年庚辰在位二十七年

道藏輯要

混元聖紀

三

尾集六

辛紂

元年丁未在位二十七年終癸酉

二十一年丁卯老君降於岐山之陽號熒邑子周文王為西

伯召為守藏史世本云老子在商為柱下史鄭玄注論語云

老彭商之賢大夫也孔穎達疏言老是老聃

周武王

姬姓木德建子為正月起癸酉滅商即位九十六年子孫繼立者八百六十五年

遷老君為柱下史史記及劉欽七略皆云為周守藏史葛洪

及內傳云文王時為守藏史武王時為柱下史惟劉向列仙

傳云生於商時為周柱下史轉為守藏史既生於商其為兩

史故當在文王之世然或先或後特未定爾按揚雄方言云

嘗聞伐輶軒之史秦籍之書皆藏於周秦之室又莊子云孔

子將西藏書於周室子路謀曰由聞周徵藏史有老聃者

藏室

云者皆考證於老子故曰徵藏

夫子欲藏書則試往因之蓋仲尼將藏書以

老子嘗爲史官諳知藏室前言往往行故先訪之也按周禮王太史內史外史御史凡五史諸侯亦有國史故禮記君動則左史書之言則右史書之左史視禮內史太史爲諸史之長掌四方之志三皇五帝之書藏之於室故謂之守藏史周幽王時有伯陽父唐固注云周柱下史老子也烈王有太史儋儋亦老子也太史爲周下大夫謂五史之任總之太史記言記事嘗在君前柱下卽史官所立之處因爲曹局之名而韋昭云伯陽爲大夫者謂職爲太史官卽下大夫也史記稱張

道藏輯要

混元聖紀

古

尾集六

蒼好書歷秦時爲御史大夫主柱下方書據周禮御史掌贊書及贊教凡其方書及內史所掌此秦官不與周同也世本云在商爲守藏史在周爲柱下史蓋文王以侯服事商未得稱在周耳則先爲守藏後居柱下無疑矣劉向之言謂先聘爲太史以其靜退卻爲他史當老子時復更免歸烈王之時又爲太史一居周世時歷數王故亦徧參諸史是以守藏柱下先後不同班固云老聃者周之老史遊於柱下以究高年據固之言則爲累代史官故稱老史隋內史薛道衡撰祠庭頌其序云爰自伏犧至於周氏綿紀歷代見質變名在文王武王之時居藏史柱下之職市朝累易容貌不改

成王

元年戊寅在
位四十七年

老君仍爲柱下史號經成子授道周公乃遊西極大秦竺乾
等國號古先生按老子內傳云伏羲時號鬱華子神農時號
傳瑒子祝融時號廣壽子軒轅時號廣成子顓帝時號赤精
子啻嚳時號錄圖子唐堯時號務成子虞舜時號尹壽子夏
禹時號甯真子作真商湯時號錫則子又文王武王凡爲十
二帝師梁黃門侍郎蕭子雲撰清虛館碑亦云太虛遼廓迹
絕言象應感攸通緣物致稱伯陽降娠垂髮皓素堯曰務成
舜曰尹壽赤精當生於顓帝錄圖出自於神農得一含元百
王資始又曰遨神九天之上遊精魏闕之下巍巍蕩蕩莫得

道藏輯要

混元聖紀

五

尾集六
×××

而名云舊紀並以老君在神農時爲大成子帝嚳時爲錄圖
子此碑獨謂錄圖出自神農而內傳又謂神農時爲傳瑒子
諒未能無少誤要當以經傳爲正抱樸子葛洪作神仙傳疑
歷代爲帝師謂皆見碎書不出仙傳正經又謂不應背澄清
而入臭濁棄天官而受人爵且曰有天地則有道術道術之
士世世有之何必常是一老子耶皆由晚學之徒好奇尙異
欲推尊老子故有此說耳唐吳天觀主尹文操嘗著論駁之
曰抱樸撰傳意在顯述老君起自修成將以訓誘後人令其
勉力故云若謂老子是得道之人則人必勉力競慕若謂是
神靈則非可學也斯其臆見耳殊不知開闢之始因學而得

道者必有自然聖降而爲師隨機傳受焉定志經云昔天尊
造大慈之初行應自然暗與理合自然玄悟本無文字撰集
成經以教將來爾由是觀之則老君自然學道而世世爲師
亦何疑焉既爲大慈之父亦何辭捨尊就卑和光臭濁乎老
子謂關尹子曰上世以來所更如沙塵動則有載劫自惟甚
苦勤太玄經亦云老子積學輪轉位登上聖應接無方不可
稱述近世出化生乎殷末虞宣出塞記云老子凝神太玄之
鄉分靈散景世世下教鶴山崔元瀨鄉記云老子應見代代
有之葛仙公云開闢以前下爲國師世世不休文始鬼谷張
輔漢並云老君生乎太無之先經歷天地不可稱載此豈謂
碎書與晚學淺見道歟稚川特未之思耳

道藏輯要

混元聖紀

六

尾集六
×××

康王

元年乙丑在
位二十六年

老君復歸于周號郭叔子復爲柱下史

昭王

元年辛卯在位五十
年老君去官歸亳

二十三年癸丑五月壬午老君西過函谷關度關令尹喜或
謂老君出關雖在周癸丑歲五月壬午恐非昭王時有言幽
王時者今檢幽王庚申年立十一年爲犬戎所滅其時無癸
丑歲也或謂宣王四十年癸丑五月十八日壬午者推其歲
月四十三年丙辰老君在渭川告宣王以周將衰幽王二年
三川震老子曰周將亡幽王卽宣王之子若宣王四十年出

關則四十三年不得尚在渭川幽王時亦不得見三川震也
平王四十二年歲亦在癸丑而五月又無壬午姚長謙年帝
記謂景王十年丙寅爲孔子師敬王三十二年癸丑度關夫
孔子生於靈王之庚戌至景王丙寅年方十七未應往師老
子也況穆王西遊已聞尹真人遇老子得道飛昇由是欽慕
遺風遂修樓觀置道士以奉祠事則知老子度關決不在穆
王之後也惟內傳之文與仙公之言符合自餘紛紜之論終
於理義乖違固不可據以爲實

二十四年甲寅老子傳道尹喜授以道德五千言卽於喜宅
南小山上昇天是時有五色光貫紫微井水皆溢

自商高宗
九年至此

道藏輯要

混元聖紀

七

尾集六

凡二百七
十四歲也

二十五年乙卯老君復分身降生於蜀國李太官家前漢劉
向列仙傳云老子生於商時爲周柱下史轉爲守藏史時稱
爲隱君子仲尼見之知其聖人乃師之乘青牛車去入大秦
關令尹待而迎之嵇康皇甫謐皆云老子生於商末葛孝先
乃謂周時託神李母者正謂降生於李太官家之時也或爲
商祚將盡周祚已興所以商末時生亦或言周時託化此胎
未必然也

二十七年丁巳老君會尹喜於青羊肆將去化胡故唐紀云
青羊肆者太上天皇大帝第二降生之所也自商道否閉周

德陵夷歷藏史以同塵棄柱史以隱迹東離魏闕西度函關

又云重爲千日之期再結一時之會將離蜀土欲化胡風遠

適流沙長移獷俗及身毒屬西胡毳布織毛爲之賓之國教煩陀阿柱

之王又魏明帝製老君贊云深憫後世託下於陳爲周柱史

經九百年無極之際言歸崑崙化被胡域次受屬賓後及天

竺於是遂遷又魏略西戎傳北史西域傳並云于闐國西五

百里有毗摩寺云是老子化胡之所也出見唐通典

二十八年戊午老君同尹喜真人降于天水啟靈山今秦州

有西昇臺聖容殿俱存

穆王元年辛巳在位五十五年壽一百有五歲

道藏輯要

混元聖紀

大尾集六

老君化胡已卽昇天

四年甲申老君復降於中國東遊扶桑會大帝校集羣仙遂

遊西海至蘇鄰國號爲大光明使尋卽復昇天穆王聞尹喜

真人得道上昇乃爲修樓觀立道士七人以奉祠事見穆王內傳及

樓觀先生傳

共王元年丙子在位一十二年

懿王元年戊子在位二十五年

孝王元年癸丑在位一十五年

夷王元年戊辰在位一十六年

老君與古古三師降于蜀綿竹之三學山授李真多以飛昇

之道今號真多治

厲王元年甲申在位三十六年

二十一年甲辰老君降於樓觀授道士宋倫以中景之道通

真之經并靈飛六甲素奏丹符

周召共和起庚申時厲王流于彘太子幼相和協共理國事十四年厲王崩乃立太子是為宣王

宣王元年甲戌在位四十七年

四十三年丙辰老君降於渭川告宣王以歲星北遷言周將

衰後二年而幽王立今渭側有伯陽川是其處見地理志時有採

薪行歌者人莫能識以問老君老君曰此活國人修習無上

正真之道也唐歷代應見圖

道藏輯要混元聖紀

元尾集六

幽王元年庚申在位十一年

第二年辛酉地動涇渭洛皆震老君言周將亡矣不及十年

數之紀也後果為犬戎所滅出史記

平王元年辛未在位五十二年東遷洛邑

三十三年癸卯十二月老君復出關開化諸國遂至西海流

麟等洲考校羣仙事訖復還中國出西昇經

威王元年壬戌在位三十三年

莊王元年乙酉在位一十五年

九年癸巳四月建卯初七日夜釋迦佛生釋氏瑞應經云四

月八日夜半生此用周正也又過去見在經云二月八日生

此用夏正也老君時年六百一十四歲釋迦生於周莊王九年乃春秋魯莊公之七年當夏四月常星不見夜明是也至魏武定八年凡一千二百三十七年云出魏書釋老志及隋書經籍志頭陀寺碑云周魯二莊親昭夜景之鑑見梁昭明太子文選齊王梁邵陵王上表云常星不見周鑑振微滿月圓姿漢感

宵夢見唐僧法苑珠林

僖王元年庚子在位五年

惠王元年乙巳在位二十五年

襄王元年庚午在位三十三年

頃王元年癸卯在位六年

道藏輯要

混元聖紀

宇·尾集六

匡王元年己酉在位六年

四年壬子佛入涅槃釋氏金光明經云壽命短促方八十歲

是也

定王元年乙卯在位二十一年

王問老君以在世神仙老君對以巾幗有古先生卽予是也

出望祠宮張僧鑑潯陽記

簡王元年丙子在位一十四年

靈王元年庚寅在位二十七年

二十一年庚戌十月二十一日孔子生

景王元年丁巳在位二十五年

悼王立五

敬王元年壬午在位四十三年

十七年戊戌孔子謂南宮敬叔曰吾聞老聃博古該今通禮樂之原明道德之歸則吾師也今將往矣明年遂與敬叔俱至周見老子按莊子云孔子行年五十乃南之沛見老子計是此年也其問禮及藏書等事雖見禮記孔子家語及史記而皆不繫年月故莫知其先後也然家語所載子夏問於孔子曰商聞易之生人及萬物各有奇偶氣分不同惟達德者能原其本也天一地二人三三三爲九九九八十一一主日月數十故人十月而生八九七十二偶以從奇奇主辰辰爲

道藏輯要

混元聖紀

三

尾集六

月月主馬故馬十二月而生其餘各從其類也鳥魚生陰而屬陽故皆卵生魚遊於水鳥遊於雲故立冬燕雀入海化爲蛤介鱗夏食而冬蟄齧吞者入竅而卵生齧齧者九竅而胎生四足者無羽翼戴角者無上齒晝生類父夜生類母敢問其然乎孔子曰然吾昔聞之老聃亦如所言由此觀之則孔子謂老聃博古該今故無所不就學焉何止問禮及五行五帝而已乎

四十一年建壬戌孔子卒見孔子家語及左氏傳老子時年八百二十四歲

莊王元年乙丑在位八年

正定王元年癸酉在位二十八年

哀王立三月

思王立五月

考王元年辛丑在位一十八年

威烈王元年丙辰在位二十四年

安王元年庚辰在位二十六年

十八年丁酉秦獻公立

夷烈王元年丙午在位七年

二年丁未老君還秦秦獻公授館致禮問於厯數老君遂出

散關出史記

道藏輯要

混元聖紀

三

尾集六

顯王元年癸丑在位四十八年

八年庚申秦孝公立老君東還遊赤城蒙山重過扶桑較集

羣仙已而隱於景山太室少室出王子年拾遺記

慎靚王元年辛丑在位六年

赧王遷都西周元年丁未五十九年乙巳盡獻其邑于秦西周遂亡

九年乙卯秦昭王立老君與尹喜諸仙西遊女几鷄頭天柱

復出散關遂昇崑崙還紫微上宮昭王聞之乃於老君所經

遊處爲置城邑以表聖跡故立老君停驛尹喜城謹按老君

本記并諸史傳記並云老子以商武丁庚辰生於亳尋乘白

鹿而昇天後一百八年帝辛丁卯降于岐周今以長厯推之

武丁元年壬申九年卽庚辰也傳記云老君以周文王時爲
守藏史武王時遷柱下史推武王以癸酉缺受缺商自武

丁庚辰至此癸酉凡一百七十四年也傳記云老子以周昭
王癸丑五月壬午將去周七月十二日到函谷關度尹喜推
昭王元年辛卯二十三年癸酉自癸酉至癸丑凡一百有一
年通前凡二百七十四年乃西度也傳記云老子甲寅年四
月於樓觀昇入太微次年乙卯分身生於蜀後二年丁巳與
尹喜會於青羊之肆遂同往西域至穆王元年復還中夏東
過扶桑大帝之所校集羣仙自昭王二十三年癸丑至穆王
元年辛巳凡二十八年則老君化胡訖復還中夏之時也史

道藏輯要

混元聖紀

三

尾集六

記云周幽王二年辛酉三川震老子言周必亡自穆王辛巳
至此癸酉凡二百二十年通前凡五百二十二年也平王二
十三年癸卯老君復出關遊西海較集諸仙魏書釋老志云
釋迦生時當周莊王九年春秋魯莊公七年四月辛卯常星
不見是也按莊王元年乙酉卽九年癸巳也自幽王辛酉至
此癸巳九十二年通前凡六百一十四年而後佛生至匡王
四年壬子入滅周靈王二十一年庚戌冬十月二十一日庚
子孔子生自莊王癸巳至此庚戌凡一百三十七年通前凡
七百五十一年也景王十五年辛未南宮敬叔生時孔子年
三十五歲敬王十一年壬辰魯定公卽位始命敬叔爲大夫

辭以先人遺命使事孔子至定公七年戊戌孔子年五十乃南之沛見老子卽老君應化諸方訖復還中夏之時也自靈王庚戌至此戊戌凡四十九年通前凡七百九十九年也傳記云秦昭王聞老子過爲散關修城邑據昭王立五十一年乃滅周推周赧王元年丁未九年乙卯乃秦昭王卽位之歲是時老君將昇於崑崙還紫微之時也自敬王戊戌至此乙卯凡一百九十七年通前計九百九十六年也老君應感無方變化莫測或昇或降莫能究悉今考傳記并長厯推計自商武丁庚辰至周赧王乙卯凡出入隱顯綿厯九百九十六年在商一百七十四年在周八百二十一年正與史傳及諸

道藏輯要

混元聖紀

三

尾集六

經典相符魏明帝贊云爲周柱史經九百年唐大學博士吳楊昊亦云老君變通靈應難測旣生商日又仕周時計其始終乃立千載此皆舉其成數也史記稱或百六十年或云二百歲者是據孔子時人斟酌老子之歲數云爾不能知其實是以每事言蓋言或也又列仙傳云去入天秦又云與尹喜俱遊流沙莫知所終皇甫謐云西之流沙作浮屠經以化戎俗文始內傳云老子出關周遊八十一國後至罽賓化胡劉向讚云德合元炁壽同兩儀據諸傳記說雖不同莫不讚其長壽蓋儒者以長生昇天之說爲怪誕故但云莫知所終說其未嘗死也唐尹文操論云老君乃積劫得道之大聖人也

故能寄惠人間和光幽顯千變萬化今古常存惟莊子假設
秦失參號之說將以逆蕩凡淺執生者耳而梁武帝遂以老
君爲尸解之仙謬矣徧尋老子始終竟無解脫之迹而莊周
獨云爾者亦猶雲將鴻濛之類並傲史之寓言若以爲實則
孔子見盜跖亦可爲實事耶按王子年拾遺記云老子至周
之末居於景室之山嘗云我常在人間不去須臾或爲凡或
爲聖但流俗之人不知之人行善惡各有罪福如影之隨形
響之應聲若能思真念善自可與我相遇以此詳之尤明其
不死審矣又按龍蹠經云老子於大羅天明霞觀中告九天
丈人曰吾今應相境界通身上顯諸天下應萬象歷劫演化

道藏輯要

混元聖紀

三

尾集六
X上上

開度兆人有道上賢降爲師授或生下界與物混冥託質通
凡浮沉莫辨與道通化應接有緣潛行救度不恃有恩旣具
神通自在世世隨機降應何生死之能累乎兒曹以管窺天
果不足怪或云老子受學於容城或問道於常樅此蓋至人
好賢樂善以多問寡亦將造端於師資以垂世立教耳豈真
有所授受耶舊傳記其子孫顯仕繼世不絕者此又至人不
欲索隱行怪以驚世駭俗故示幻迹以和光同塵耳今慮後
世貪縱之夫認幻爲真而託道爲姦者將授以藉口故皆刪
之至十六變之說事迹隱晦亦無述焉

秦始皇帝

元年乙卯在位三十六年
庚辰初并天下爲皇帝

二十八年壬午封禪泰山乃建老君祠於樓觀之南躬行饗

祀老君降于祠授帝以鬼林經策使鬼神之符出樓觀傳

前漢文帝元年壬戌

老君先降于陝河之濱號河上公亦曰河上丈人帝親訪之

老君授以道德經也今陝州府北有河上廟并文帝望仙臺

存焉出史記及抱樸子神仙傳或作景帝誤矣

成帝河平元年癸巳

河平二年甲午老君降于瑯琊郡曲陽淵授于吉太平經出後

漢書

後漢明帝佛法初入中國

道藏輯要

混元聖紀

三 尾集六

章帝元和元年甲申

元和二年乙酉老君再降授于吉真人一百八十戒

安帝永初元年丁未

永初三年己酉老君降于泰山名江夏史劉圖較定天下簿

籍因示罪福報應之事見唐記聖賦及應現圖

順帝永建元年丙寅後六年改元陽嘉又四年丙子改永和又六年壬午改漢安又二年甲申改建康

漢安元年壬午老君降于蜀之鶴鳴山授于張道陵正一

盟威秘錄五月再降賜泰清中經九百三十卷符文七十卷

建康元年甲申老君再降于閬州雲臺山授天師三洞眾經

及超度九祖齋直之法見天師傳及蜀圖經

桓帝建和元年丁亥後三年庚寅改和平又一年辛卯改元嘉
又二年癸巳改永興又二年乙未改永壽又三年戊戌改
延熹又九年
丁未改永康

永壽元年乙未老君降于成都授天師北斗創死注生之法

今成都府玉局化卽其地又降于鹿堂山授以制六天斬邪

文見天師傳及蜀圖經

延熹八年帝遣使詣陳祀老君命邊韶撰碑文九年帝親祀

老君於濯龍宮用郊天樂並見後漢記

靈帝建寅元年戊申後四年壬子改嘉平又六年戊午改光和又六年甲子改中平

光和二年己未老君降于天台山授仙人葛玄上清靈寶大

洞等經及三錄七品齋法勸戒法輪轉神入定等經見天台山記及

道藏輯要

混元聖紀

卷

尾集六

太極仙翁傳

魏陳留王

咸熙元年甲申老君降于隴右臨洮郡謂王始曰天下不久

當太平見晉書

晉安帝隆安元年丁酉後五年壬寅改元興又三年乙巳改義熙

元興元年壬寅姚秦洪始五年也老君下降接行山嶽至華山敕仙

人成公興令移居嵩山仍賜以仙樂見後魏書

後魏明皇帝永興元年卽位十五年改元神瑞又二年改元泰常

神瑞二年乙卯晉安帝義熙十一年也老君降于嵩山授道士寇謙之

雲中音誦新科之戒泰常二年丁巳老君再降賜寇謙之符

錄七十卷

見後魏道釋志

太武皇帝

太平元年老君降于嵩山命寇謙之授帝以太平真君之號

遂改元太平真君

出魏書

隋煬帝

太業元年丁丑

太業十三年丁丑老君降于終南山語山人李淳風以唐公

受命之符

出金鎖流珠記

唐高祖

武德元年戊寅

武德二年己卯老君降于羊角山語吉善行令奏聞云我帝

祖也今唐得聖治社稷延長

出唐記

道藏輯要

混元聖紀

美

尾集六

五年壬午老君再降於廟所告以破賊之期

出唐記

高宗

永徽元年庚戌後七年丙辰改元顯慶又五年辛酉改元龍朔又三年甲子改元麟德又二年丙寅改元乾封又二年戊辰改元總章又二年庚午改元咸亨又四年甲戌改元上

元又二年丙子改元儀鳳又三年己卯改元調露又一年庚辰改元永隆又一年辛巳改元開耀又一年壬午改元永淳

龍朔二年壬戌帝幸洛陽宮建清廟於北邙治以祠老君設

醺慶讚老君降于殿上二真人夾侍光耀階壇眾咸瞻仰宮

闈令權大力等列狀奏聞詔依所見圖寫為瑞像

見洛陽錄事楊護師

狀奏

乾封元年丙寅帝封岱嶽駕至亳州謁老君御製冊文上尊

號曰玄元皇帝聖母為先天太后

出唐書

儀鳳三年戊寅帝敕建齋于陽清廟時老君降于壇上祥光
照映乘白馬履壇石皆有跡眾所瞻仰登時奏聞賀表云金
相玉毫彩奪夜明之景白駒丹鬣跡留天駟之庭見胡散大
夫孫瑞奏

則天武后

嗣聖元年甲申二月改元文明九月又改光宅
攝位二十二年乙巳改元神龍一十八年

文明元年甲申老君降于號州皇天原命鄔元宗令傳言武
后不可革命出唐書景龍四年庚戌為平內難疑決老

君為白衣老父賣卦于春明門外象曰宜取天下吉利在三
日內後於其處立廟出洛中記異

玄宗明皇

開元元
年癸丑

道藏輯要

混元聖紀

元

尾集六

後二十九年壬午改元天寶又三年甲申改年為載開元十
七年老君降于蜀州新興寺隱景于佛殿柱中宛如刻畫削
洗愈現本路文武官及道僧俗尼同狀奏聞有云現於殿柱
杳疑作史之年照彼佛祠緬若化胡之日見於益州長史
張敬申奏狀表

開元二十九年老君降于丹鳳門外語田同秀曰我昔日入
流沙藏一金靈符在尹喜舊宅可奏帝取之帝遣使求得之

於函谷關故墟

出唐書

天寶二年癸未正月上老君尊號曰大聖祖玄元皇帝十二
月帝幸華清宮老君降現于朝元閣上遂改朝元閣為降聖

閣見唐史

天寶七載戊子上老君尊號曰聖祖大道玄元皇帝

九載庚寅老君降于太白山語山人王玄翼以寶仙洞有妙

寶真符上命刑部尚書王倕等往求果得之

出唐書

十三載甲午二月癸酉帝朝獻太清宮加上老君尊號曰大

聖祖高上大道金闕玄天元皇大帝

出唐書

十五載丙申帝幸蜀老君降于漢中郡黑水之側帝命刻石

像於所見之處又乘白鹿降于利州昌嶺以示收祿山之兆

詔於所見之處立自然觀

並出唐書

肅宗天寶十五年丙申改元至德又三年戊戌改乾元又二年庚子改上元

至德二年丁酉老君降于通化郡雲龍巖自地接天儀相炳

道藏輯要

混元聖紀

三

尾集六

然詔圖其本明皇御讚曰晝現殊相空浮瑞色道釋人天作

禮瞻奉申命藻繪示諸郡國

見唐太上皇瑞讚云

敬宗寶曆元年乙巳

寶曆二年丙午老君降于太清宮前御路指示長安縣鄭翦

陷井之處

見柳公權書韋處厚所撰碑

懿宗咸通元年庚辰

咸通十年己丑龐勛領三千餘人欲劫奪太清宮時士庶數

百餘家在宮避難咸見老君乘空而行須臾黑霧昏暝賊迷

路自相蹂踐龐勛亦溺水死

見汴州節度李尉奏狀

宋真宗皇帝諱符元年戊申

大中祥符七年甲寅駕幸亳州謁太清宮親奉冊寶上尊號

曰太上老君混元上德皇帝

出宋朝事實

徽宗皇帝

政和元年辛卯

政和二年壬辰老君乘白馬駕祥雲降于茅山玉晨觀授梁光映加句天童經其餘降現事迹紀傳不繫時代者不述與夫放光見瑞示夢傳言靈驗等事非化身下降者不復載于譜也

道藏輯要

混元聖紀

三

尾集六

丁卯